

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine na sjednici Predstavničkog doma, održanoj _____2007.godine, i na sjednici Doma naroda, održanoj _____2007.godine, usvojila je

Zakon o izmjenama i dopunama Zakona o akcizama u Bosni i Hercegovini

U Zakonu o akcizama u Bosni i Hercegovini ("Službeni glasnik BiH", br.62/04, od 30.12.2004.) neophodno je izmijeniti, kako slijedi:

Član 1.

Član 5. stav (3) mijenja se i glasi:

- (3) Za duhanske prerađevine poreska obaveza nastaje u roku 15 dana nakon puštanja proizvoda u promet.

Član 2.

Član 7. mijenja se tako da se dodaju novi stavovi (3) i (4) i glase:

- (3) Poreska osnovica kod uvezene robe je kao u zemlji porijekla.
(4) Za duhanske prerađevine akciza se plaća u apsolutnom iznosu zavisno od toga kojoj akciznoj grupi cigareta proizvod pripada, a poreska osnovica je:
1. za cigarete – paketić od 20 komada,
 2. za duhan – 1.000 grama,
 3. za cigare – 1 komad i
 4. za cigarilose – paketić od 20 komada.

Član 3.

Član 9. mijenja se i glasi:

- (1) Na promet naftnih derivata akciza se plaća po litru, i to na:
1. petrolej 0,30 KM; (tarifni br. 2710 11 21 00)
 2. dizel-gorivo 0,30 KM;
 3. ulje za loženje ekstra lako (ES) i lako specijalno (LS) 0,30 KM;
 4. motorni benzin – bezolovni 0,35 KM;
 5. motorni benzin 0,40 KM.
- (2) Na promet naftnih derivata iz stava (1) tač. 2., 4.i 5. ovog člana plaća se putarina po litru u iznosu od 0,20 KM.

Član 4.

Član 10. stav (1) mijenja se i glasi:

- (1) Na promet sljedećih akciznih proizvoda akciza se plaća po litri i to:
- | | |
|----------------------|----------|
| 1. bezalkoholna pića | 0,12 KM; |
| 2. pivo | 0,22 KM; |
| 3. vino | 0,30 KM. |

Član 5.

Član 13. stav (1) mijenja se i glasi:

- (1) Na promet kafe (sa i bez kofeina) akciza se plaća, prilikom uvoza, i to za :

1. sirovu kafu	1,30 KM/kg
2. prženu i mljevenu kaf	3,00 KM/kg
3. ekstrakt kafe, pržene ljuste i opne	3,50 KM/kg

Član 6.

Član 14. potpuno se mijenja i glasi:

- (1) Na promet duhanskih prerađevina plaća se akciza u apsolutnom iznosu i to:

Grupa A; akciza 0,50 KM,
Grupa B; akciza 0,80 KM i
Grupa C; akciza 2,00 KM.

- (2) U grupu A ubrajaju se cigarete sa i bez filtera pakirane u meko pakiranje i koje sadrže najmanje 50% domaćih vrsta duhana (virginia, berlej ili hercegovački ravnjak) u čemu je najmanje 25% donjih branja ili na njima zasnovanih surogata domaćeg porijekla (duhanska folija i tehnološki obrađeno rebro), a koje su proizvedene i prvi puta stavljene u promet na teritoriji Bosne i Hercegovine.

U grupu B ubrajaju se cigarete s filterom pakirane u tvrdo pakiranje i koje sadrže najmanje 50% domaćih vrsta duhana (virginia, berlej ili hercegovački ravnjak) u čemu je najmanje 25% donjih branja ili na njima zasnovanih surogata domaćeg porijekla (duhanska folija i tehnološki obrađeno rebro), a koje su proizvedene i prvi put stavljene u promet na teritoriji Bosne i Hercegovine.

U grupu C ubrajaju se sve ostale cigarete koje ne ispunjavaju uslove iz grupe A ili B.

Član 7.

Član 17. stav (1) mijenja se tako da se dodaje tačka 3. i glasi:

(1) Akciza se ne plaća na:

1. akcizne proizvode koje se izvoze;
2. akcizne proizvode koje se pod nadzorom poreskog organa uništavaju ili čine neupotrebljivim za korištenje;
3. denaturisani alkohol, pod kojim se smatra alkohol koji je denaturisan propisanim sredstvima za denaturisanje (5 kg/100l izipropanola i 78,8 gr/100l butanola koji isključuju konzumiranje ovakvog alkohola) od strane proizvođača alkohola, odnosno uvezen je kao denaturisani alkohol iz inozemstva.

Član 8.

Član 26. Zakona o akcizama mijenja se tako da se dodaju stavovi (4) , (5) , (6) i (7); i glasi:

- (4) Poreski obveznik koji je platio akcizu na lož-ulje (ES i LS) ima pravo na povrat uplaćenog iznosa, ako je lož-ulje koristio kao tehnološko gorivo u proizvodnom procesu, kao i u poljoprivrednoj proizvodnji u skladu s utvrđenim normativima. Zahtjev za povrat podnosi Upravi za indirektno oporezivanje BiH.
- (5) Poreski obveznik koji je platio akcizu iz člana 3. tačka (2) ovog zakona ima pravo na povrat uplaćenog iznosa ako se nedvosmisleno može utvrditi da upotrebom sredstva ne koristi putnu infrastrukturu u Bosni i Hercegovini (poljoprivredne mašine, traktori agregati, kombajni i sl.).Zahtjev za povrat podnosi Upravi za indirektno oporezivanje

BiH.

- (6) Poreski obveznik koji je platio akcizu na rafinirani alkohol koji se koristi kao repromaterijal, (u farmaceutskoj industriji,kozmetičkoj i parfimerijskoj proizvodnji, za konzerviranje preparata i pulpiranje voća, za proizvodnju jestivog octa, prehrambenih i drugih proizvoda, koji koriste fakulteti, instituti i druge naučne ustanove koje alkohol koriste u naučno-nastavnom procesu, te za ispitivanje kvaliteta sirovina i gotovih proizvoda), a u skladu s unaprijed utvrđenom recepturom. Zahtjev se podnosi Upravi za indirektno oporezivanje BiH.
- (7) Poreski obveznik koji je platio akcizu iz člana 3. stav (1) tačka 2. ovog zakona ima pravo na povrat uplaćenog iznosa akcize ako je registrirani poljoprivredni proizvođač, te ako pogonsko gorivo iz ovog člana koristi kao pogonsko gorivo za radne-poljoprivredne mašine, po utvrđenim normativima Uprave za indirektno oporezivanje BiH. Zahtjev za povrat podnosi Upravi za indirektno oporezivanje BiH.

Član 9.

Ovaj zakon stupa na snagu danom objavljivanja u „Službenom glasniku BiH“, a primjenjivat će se od 1.1.2008.godine.

PSBiH broj; _____/07

Sarajevo; _____2007. god.

Predsjedavajući
Predstavničkog doma
Parlamentarne skupštine BiH

Predsjedavajući
Doma naroda
Parlamentarne skupštine BiH

Obrazloženje:

1. Ustavni osnov za donošenje ovog zakona sadržan je u članu III., 1. b) i c) i 5.a) i b)

2. Razlozi za donošenje ovog zakona su:

Predloženim izmjenama člana 5. osiguravaju se uslovi privređivanja u duhanskoj industriji kao i u drugim granama, te se izbjegava plaćanje unaprijed.

U sljedećim članovima osigurava se zaštita i izjednačavaju uslovi proizvodnje i prodaje u duhanskoj industriji kao u zemljama u okruženju, te se akciza plaća u apsolutnom iznosu kako je to predviđeno članom 5. ovog zakona.

Izmjenama Zakona o akcizama u BiH za naftu i naftne derivate

povećava se za odgovarajući iznos akcize, za 6 pf za benzine i 7 pf za naftu, kao u čl. 3. ovog zakona. Također je u članu 8. predviđen povrat uplaćene akcize na lož-ulje, samo ako se ono koristi kao tehnološko gorivo u proizvodnom procesu i poljoprivrednoj proizvodnji ali ne kao gorivo za zagrijavanje prostorija. Posebno se omogućava povrat akciznog dijela poreza i putarine za utrošeno gorivo za radne mašine koje se koriste u poljoprivrednoj proizvodnji i koje ne koriste putnu infrastrukturu u BiH, što čini poljoprivrednu proizvodnju konkurentnijom, a to se samo odnosi na registrirane poljoprivredne proizvođače i pravna lica.

U članu 4. ovog zakona povećana je za sva alkoholna i bezalkoholna pića (izuzimajući prirodne sokove) u apsolutnom iznosu od 2 pf, radi recikliranja otpada, odnosno svih vrsta ambalaže koja je preplavila Bosnu i Hercegovinu. Zaštita okoline mora se finansirati kroz otkup i recikliranje otpada, a uvedena razlika akcize bila bi osnov za fondove takve vrste.

Izmjenama člana 13. stav 1. Zakona izbjegava se dvostruko oporezivanje kafe (sirova kafa kod uvoza kao repromaterijal i poslije prerade u domaćim pržionicama, kao finalni proizvod). Na ovaj način stimulira se i štiti domaća prerada. Prerađivačima se osigurava položaj identičan s prerađivačima kafe u susjednim zemljama, gdje se akciza plaća isključivo prilikom uvoza. Stvaraju se pogodniji uslovi za modernizaciju i razvoj prerađivačkih kapaciteta i uključivanje u sve veće mogućnosti izvoza prerađene kafe iz BiH. Ovim izmjenama Zakona znatno se smanjuje evidentno sivo tržište u prometu kafe u BiH.

Zakonom o akcizama u Bosni i Hercegovini ("Sl.glasnik BiH", br.62/04, od 30.12.2004.) denaturisani alkohol nije bio izuzet od plaćanja akcize. Ovakva odredba ovog zakona dovela je domaće proizvodne firme u veoma tešku poziciju na tržištu, s obzirom da se on koristi kao repromaterijal u domaćoj hemijskoj industriji, što je konačne proizvode u hemijskoj industriji učinilo nekonkurentnim na tržištu, te se isti proizvodi uvoze i preprodaju u Bosni i Hercegovini, a domaća proizvodnja je zaustavljena.

Neophodno je akcizne tarife uskladiti sa zemljama u okruženju da bi bh. proizvodi bili konkurentni na tržištu.

3. Principi sadržani u osnovnom Zakonu o akcizama u BiH nalaze se i u ovom, s tim što se princip jednakosti na tržištu u zemljama u okruženju stavlja u prvi plan, te se dodaje i princip rasterećenja poljoprivredne proizvodnje, koji do sada nije bio sadržan.

4. Dodatna sredstva za provođenje ovog zakona nisu neophodna. Naprotiv, provođenjem ovog zakona budžeti BiH i entiteta povećat će se za oko 60 miliona KM.

5. Mišljenja nadležnih institucija i državnih organa bit će pribavljena u parlamentarnoj proceduri.